



27. januar 2015

UKA 2015/124

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiuppara:

Aatsitassarsioqatigiit aatsitassanik misissuiniarneranni aammalu misissuinerit suli ingerlagallarneranni innuttaasunik oqimaaqatigiissumik paasisutissiisoqartarnissaa siunertaralugu, apeqquteqaat tunngavigalugu Inatsisartut oqallinnissaannik siunnersuut.

(Inatsisartunut Ilaasortaq Kalistat Lund, Inuit Ataqatigiit)

Tunngavilersuut

Aatsitassarsioqatigiiffiit ataasiinnarmik, tassalu aningaasarsiornissamik, siunertaqarlutik maani nunatsinniipput. Taamaattumik kinguaariinni massakut inuusugut kinguaariit aggersut qanoq inuuneqarsinnaanerannut qanorlu atugaqalernissaannut immikkut ittumik akisussaaffeqarpugut.

Aatsitassarsiornermut tunngasutigut Nunatsinni annikitsuinnarnik misilittagaqarnerput eqqarsaatigalugu, aammalu nunani allani misilittagaalersimasut pillugit ilisimasavut aallaavigalugit, isumaqarpunga inatsisitigut atugassarititaasut ataavartumik ineriartortituassagigut.

Innuttaasunik paasisitsiniaanernik taallugit ataatsimiisitsisarnerit, arlaannaannulluunniit aattuumassuteqanngitsunit tamatigut ingerlanneqartarnissaat pisariaqavissoq isumaqarpunga.

Maannamut misilittagaalaareersut annikkikaluartut takutereermassuk paasisitsiniaasarnerit nammineq soqutigisamut tapersersortissarsiorfittut atorneqarsinnaannerat periarfissaqarpallaartoq. Arlaannaannulluunniimmi attuumassuteqanngitsunit paasisutissinneqarneq aallaaviusussaavoq inuup kiffaanngissuseqarluni pisamut aalajangersimasumut isummerinnaanissaannut.

Aatsitassat piiarniarneqartut qanoq sunniuteqarsinnaaneri aallaavigalugit inuiaqatigiit assigiinngitsunik isumaqarsinnaasarput, tamanna ilisimavarput soorlu uran pillugu nalilersuisoqarnerani.

Isumaqarpunga maannamut periarfissarititaasut aatsitassarsiornissamik soqutigisallit, inuiaqatigiit nalilersuinerannut akulerullutik, namminneq pisuunngoriartuutissaminnik sulissuteqarlutik isumaqatissarsiornissaminnut ammatitsisut. Tamanna sutigulluunniit ingerlanneqarsinnaavoq soorlu paasisitsiniaanertut taallugit innuttaasunik ataatsimii-sitsisarnertigut, arsaattartoqatigiinnut aningaasaliisarnikkut assigisaasigulluunniit.

Soorunami aningaasaliiffigineqartunut qujanaraluarlutik kisianni periaaseq kusanangilaq aamma killilerneqartariaqarpoq. Kinguaariit nuna atugassaat qanoq atugassaqarfiussanersoq pineqartillugu, pingaartumillu misissueqqaarnerit nalaanni, aningaasanik akiliisunit sunneeqataaffiginiarneqarani inuit eqqarsarluarnerannit ilusilersorneqartariaqarmat.

Nunarsuatta sinnerani aatsitassarsiorneq ilaatigunngooq unneqqaserluffioqaluni ingerlanneqartualersimasoq tusaamagatsigu, neriullunga periaatsit avatitsinni atorneqartut assiliinnarnagit uagut nammineerluta Nunatsinnut naleqquttumik ilusiliartuaassasugut.